

Kompas Spiritual

Mei-Yüni 2010

edishon 2



Den e edishon aki

- 1 Introdukshon
 - 2 Kontinuashon di Introdukshon
 - 3 Kontinuashon di Introdukshon
 - 4 Kapelan na palabra
 - 5 Pa Bo Sa (desaroyo spiritual)
 - 6 Kontinuashon Pa Bo Sa
 - 7 Kontinuashon Pa Bo Sa
 - 8 Kontinuashon Pa Bo Sa
- ☺ Athunto: Aktivitat Spiritual
- ☺ " Stòp Stap "

*Mi por enfrentá tur kos
pa medio di esun ku ta
duna mi forza (Fil 4:13)*

Introdukshon:

E promé edishon di Kompas Spiritual a kai na smak? Nos lo apresjá bo komentario, bo opinion. Ata awor e di dos edishon, disfrutá di dje.

Den e promé edishon nos a introdusí nos Komishon Pastoral na boso. Awor nos ke sigui duna mas informashon tokante e maneho spiritual den Scouting Antiano. Ta asina ku Komishon Spiritual a presentá un proposishon pa maneho spiritual den Scouting Antiano i esaki a keda stipulá dor di nos bestür.

Maneho Spiritual i religioso di Scouting Antiano. Propósito:

Scouting Antiano a establese reglanan pa uso di religion den nos organisashon afirmando ku desaroyo spiritual i religioso ta un parti integral di e programa di Scouting. Scouting Antiano ta komprometé pa ekstendé Scouting, su propósito i método na mas tantu hóben posibel den nos komunidad. Pa e motibu aki ningun hóben por wòrdu ekskluí for di Scouting pa motibu di su religion.


E maneho aki ta konta pa:

Tur Scout for di Bever te Lider, Miembronan di direktiva, Komisarionan, komishonnan di grupo òf di mayor i tur ku di un manera òf otro ta envolví ku Scouting

Baden Powell su posishon pa ku Dios i religion den Scouting:

Un análisis di loke Baden Powell a skibi ta demostrá ku e konsepto ku tin un forsa riba tur hende ta e base di Scouting. Henter e propósito edukashonal di nos movementu ta konsistí di yuda e hóben kambia di e mundu material i bai mas en buska di balornan Spiritual. Ora a puntra Baden Powell unda religion a drenta Scouting el a kontesta:

Komishon pastoral Scouting Antiano



Kompas Spiritual

Mei-Yüni 2010

e no a drenta semper e ta tei. Ningun hende por ta mas mihó si e no kere den Dios i obedesé su leinan. Pues tur Scout mester tin un religion. Religion ta mustra un kos simpel. Promé stima i sirbi Dios. Di dos stima i sirbi bo próhimo.

Maneho:

Tur miembro di Scouting Antiano ta wòrdu enkurashá pa biba su fe den e mayor ekstenso

Lidernan mester yuda e hóben dor di inkorporá den nan programa aktividatnan ku ta laga e hóben eksperensia un bida spiritual i religioso basá riba su fe

Tur miembro di Scouting Antiano mester hasi un esfuerso pa forma parti di un religion

- Scouting Antiano ta un organisashon ku ta rekonosé ku nos tin un deber pa ku Dios. Esaki ta un parti di nos promesa komo Scout.
- Lo involví mayornan mas tantu posibel den e esfuersonan aki, rekonosiendo ku esaki ta un ròl di mayornan. Kaminda e esaki falta Scouting Antiano lo duna guia.
- Tur Miembro di Scouting Antiano mester wòrdu enkurashá pa partisipá den sirbishinan di nan religion

Tur miembro di Scouting mester hasi máksimo esfuerso pa kumpli ku e promesa di Scout **HASI MI DEBER PA KU DIOS**

- Pa un Scout hasi su deber pa ku Dios e mester konosé Dios i su debenan
- Scouting Antiano lo traha programanan ku ta yuda e hóbenan deskubrí su Debernan

Tur miembro di Scouting mester sòru pa práktika su fe komo parti di su bida

- Nos mester enkurashá e hóben práktika su fe
- Henter su bida mester ta basa riba biba e idealnan di su fe

Bou di ningun manera no ta permití pa gruponan forsa un hóben partisipá den un aktividat religioso ku no ta su denominashon.

- Komunikashon ta esensial den e kaso aki. Mester informá mayornan i hóbenan delantá ora ta organisá un aktividat religioso.
- Si e aktividat ta di un religion so mester informá mayornan i hóbenan esaki. Mester hasi mas tantu posibel ku tur hóben ta partisipá den e aktividatnan.
- Kaminda ta aktividatnan nashonal esakinan mester haña un karakter Eukuméniko pa evitá ku hóbenan ta wòrdu ekskluí



Kompas Spiritual

Mei-Yüni 2010

Dios ta Amor

Mester envolví mayornan den kaso di duda
Gruponan mester krea un ambiente pa kada hóben práktika
su religion

Bou di ningun manera no ta konsehabel tene sekshonnan di
Sirbishi òf splikashon di beibel sin e konosementu apropiá i
mester apliká e reglanan di religion.

Mester respetá religion di otro

- Esaki ta tarea di lidernan (lidernan mester ta mas
neutral posibel)
- Mester inventarisá e diversidat di religion den grupo
- Lidernan no por tene sekshonnan kaminda e hóben ta
sinti ku su fe ta wòrdu kwestioná òf balotá òf kítika.
- No por organisá skèts kaminda religion ta wòrdu
bofoná.
- Un Lider no por imponé su fe riba hóbennan.
- Por tene sekshonnan partikular bou di guia di lidernan
kaminda hóbennan ta splika kon nan ta biba nan fe
- Religionnan rekonosé pa Scouting Antiano
- Scouting Antiano ta respeta tur religionnan i institutonan
spiritual ku ta forma parti di nos pais.
- Scouting Antiano por afiliá na un òf mas Organisashon
Religioso òf Spiritual bou di e siguiente kondishonnan:
 - Direktiva di Scouting Antiano mester bai di
akuerdo ku e afiliashon aki
 - Ku Scouting Antiano tin miembronan ku ta
práktika e esensia di E religion en kestion
- E posibilidat tei pa un grupo afiliá na Scouting Antiano
haña pèrmit pa ta un grupo sera esta ku e ta mara na
un denominashon òf misa
 - Direktiva ta e instansha den Scouting Antiano ku
ta trata e petishonnan aki



Kompas Spiritual

Mei-Yüni 2010

Nos Kapelan di Scouting Antiano na palabra

“Boso ta Dios su eskohidonan, su pueblo santu stima: ta p'esei boso mester bisti boso ku birtutnan di kompashon tierno, bondat, humildat, masedumbre i kompreshon.” (Kol. 3:12-21)

Estimado amigunan,

Esaki ta un teksto masha bunita pa nos para ketu riba dje den nos di dos edishon di Kompas Spiritual. E ta un teksto tambe masha profundo. Dios ta bisa nos pa medio di San Pablo su troso ku nos ta eskohidonan di dj'E. Nos a keda kreá segun imáhen i semehansa di Dios, manera skritura ta bisa nos den buki di Génesis (Gn.1:26)



Nos a keda skohe pa biba un bida ku ta agradá Dios. Nos a keda skohe komo adulto i hóben, komo miembronan di un organisashon pa kumpli ku loke Dios ke di nos. Nos a keda skohe pa Dios, pa nos por yuda edifiká e kurpa di Kristu aki na mundu.

Kon mi por hasi esaki?

Dios a pone bo riba mundu ku un propósito, ku un meta. E meta di nos eksistensia ta pa nos sirbi Dios pa medio di nos próhimo. Ta p'esei, mi mester biba mi bida komo si fuera ta Kristu mes mi ta sirbi. Mi ta pone mi talentonan pa sirbi Kristu den Scouting, por ehèmpel si mi por toka, kushina, konta òf organisá, mi ta pone esaki na disposishon di mi grupo. Mi ta pone mi talentonan, mi donnan na sirbishi di mi grupo; sea ku mi ta un lider òf mi ta un miembro di grupo.

E konosementu, sabiduria ku Dios a duna mi, mester sirbi pa yuda mi grupo di krese den konosementu pero tambe den aktividatnan. Ora mi ta partisipá den grupo mi mester yuda otro deskubrí nan propio talento òf nan propio donnan. Ora mi ta sirbi un miembro di grupo mester bira manera mi ta sirbi Kristu.

Si mi ta sirbi Kristu anto mi manera ku mi ta kontribuí na mi grupo mester ta positivo. Mi aktitut mester ta semper habri pa otro. Mi mester ta disponibel pa duna otro un man, pero mas ainda mi mester traha tempu pa kumpli ku mi obligashonnan òf mi responsabilidat. Mi mester por komprondé pa otro manera e santa skritura ta siña nos i mi mester tin kompashon ku mi ruman. Mi mester ta generoso i bondadoso ku mi mes i ku esnan ku Dios ta pone riba mi kaminda.

Mi ta kere ku un pregunta ku kada hende mester puntra nan mes, no ta loke Scouting por hasi pa mi, pero tambe kiko ami por hasi pa Scouting.

Ban purba na hasi manera San Pablo ta invitá nos den e teksto di awe, pues ban bisti nos mes ku Kristu. Ku Kristu mi por hasi hopi. Ban ta un bendishon pa mi ruman, pa mi famia, pa mi grupo i pa mi komunidad.

P. Morrison

Kompas Spiritual

Mei-Yüni 2010

Pa bo Sa (desaroyo spiritual)

Selebrashon di Santu Sakrifisio di Misa

Den nos rúbrika di ta bon pa bo sa di e edishon aki, nos ta trata e Ritualnan di Sakrifisio di Misa. E Misa Katóliko ta yen di ritual ku no tur bes nos ta para ketu na nan motibu i nifikashon. Nos idea ta pa sera bo konosí ku algun di e aspekto i ritualnan di nos Sakrifisio di Misa òf ku otro palabra selebrashon Litúrgiko. Nos ta kere ku un tiki mas informashon lo yuda nos komprende un ke otro mihó lo ke ta esensial pa nos kresementu Spiritual.

E selebrashon ta konsistí di tres parti mayor.

- Rito di Apertura
- Liturgia di Palabra
- Liturgia Eukarístiko



Rito di Apertura

Henter e rito aki ta destiná pa hinka nos fielnan den un estado di orashon i humildat konsentrando riba Hesus su gracia di pa nos salbashon i nos rekonsiliashon komo pekadó.

Na momentu ku Misa kuminsá e pastor ta pidi tur pa hasi e señal di krus. E pastor ta proklamá e presensia di Señor den komunidad. Pueblo ta respondé bisando AMEN¹. Rekonosiendo e presensia di Hesus ku a krea e komunidad.



Akto penitensial. Nos ta saminá nos konsenshi i konfesá nos pikanan. Hasiendo esaki nos ta drenta den e selebrashon librá di nos pikanan. Kòrda si tin pikanan mas grandi (pika kapital) mester hasi un konfeshon serka un pastor pa haña apsolushon di pika.

Gloria. Esaki ta un himno di alabansa ku kual e komunidad reuní den Spiritu Santu ta duna Gloria na Dios Tata i na Hesu Kristu. (Den tempu di atvènt i kuaresma no ta bisa e Gloria komo dimenshon penitensial den e temporadanan aki).

Ta sigui orashon di apertura. Aki kada un ta papia ku Dios ku su mes palabra den silencio. Despues pastor ta ofresé un orashon pa henter e komunidad. Na final tur ta kontesta Amèn.

Kompas Spiritual

Mei-Yüni 2010

Liturgia di Palabra

Den e liturgia di palabra Kristiannan ta bini huntu pa gradisí Dios pa Dios su grasía. Skuchando e palabra di Dios (beibel) nan ta krese den fe mas konforme e pensamentu di Kristu. Dios ta revelá nos awor e sekretu maravioso di su plan di salbashon pa hopi hende. E palabra ta loke Dios ke revelá nos awe. Nos mester skucha ku atenshon. Djadumingu i dianan di fiesta warda² tin promé i di dos lektura. Mayoria bes promé lektura ta saka for di

Biba bo fe.

¹ AMEN na final di kada orashon ta bini di un tèrmino hebreo ku ta nifiká "ta bèrdat", "asina ta". E ta un afirmashon skerpi ku no ta laga duda riba su realidat.

² Fiesta warda ta dianan ku iglesia a denominá komo dianan di selebrashon special. Pasku, Asenshon etc.

tèstamènt bieu. Despues ta sigui salmo responsorial. E salmo ta un kontesta di fe riba e Palabra di Dios. Di dos lektura òf epistel usualmente ta saka for di tèstamènt nobo. Na final di lektura e lektor ta bisa Palabra di Dios, afirmando ku ta palabra di Dios a keda pronunsiá. Nos ta rekonosé esaki kontestando Nos ta alaba-Bo Señor.

Evangelio. Evangelio ta nifiká Bon Notisia. E postura pa evangelio ta para. Esaki ta demostrá ku nos ta para kla pa tuma e bon notisia kaba sali pa kompartié. E Pastor ta introdusí e evangelio. I nos ta hasi tres siñal di krus. Unu riba frenta, unu riba lèpnan i unu riba kurason. Rekordando nos Kristu den nos pensamentu (frenta), Kristu pronunsiá ku mi lepnan i Kristu den mi kurason. Skuchando e proklamashon ta rekordá i identifká nos Katólikonan ku e promé komunidad ku a tende e palabranan aki for di boka di Kristu. Na final di e evangelio pastor ta bisa Palabra di Dios, afirmando ku ta palabra di Dios a keda pronunsiá. Nos ta rekonosé esaki kontestando: Gloria na Bo Señor Hesus.



Predikashi òf Homilia ta basa riba e lekturanan for di beibel. E saserdote por pone e lekturanan den nos situashon aktual. E ta splika e plan di Dios. E predikashi por ta un splikashon tambe di e lekturanan.

Profeshon di fe. Kredo. Kredo ta profeshon por eskrito ku ta resumí nos búskeda pa un komprendementu mas profundo di Hesus i su mensahe.

Interseshonnan general. Aki nos ta resa pa: henter iglesia, otoridatnan sivil, esnan den nesesidat i komunidad lokal i defuntunan.

Kompas Spiritual

Mei-Yüni 2010

Liturgia Eukarístiko

Si e liturgia di palabra ta konsentrá riba e Ambon òf prekstul, e Liturgia Eukarístiko ta konsentrá riba e Altar. Un mesa drecha pa komementu. E Saserdote komo representante di Kristu ta realisá loke Señor mes a hasi na Último sena, ora el a manda su apòstelnan hasi meskos na su memoria i instituí asina e Sakrifisio i e komementu di Pasku.

Preparashon di ofrendanan. Awor ta hiba pan i biña altar, elementunan ku Kristu a tuma den su man. Miéntras ta pasa kolèkt. E kolèkt ta nos ofrenda. E ta un ekspreshon real di nos aporte na nos Misa. Tur hende mester duna segun su posibilidat i generosidat. Kòrda Dios gusta hende ku ta duna kontentu.³

Durante di e akto aki pastor ta presentá e pan i biña i pone nan riba altá. Pastor ta basha algun gota di awa den e biña pa simbolisá e union di Kristu su persona dibino i humano. Si tin sensia pastor ta sensia e altar, despues e sirbidó di misa ta sensia pastor i fielnan. Pastor ta laba man manera e hudiunan tabata laba man promé ku un komementu ritual i tambe pa simbolisá e hecho ku e pastor ta limpia su mes di tur pika i impuresa. E rito aki ta kaba ku un orashon kòrtiku riba e ofrendanan.

Orashon Eukarístiko. Eukaristia ta un palabra griego ku ta nifiká gradisimentu òf akshon di grasia. E orashon aki ta un gran akshon di grasia i alabansa na Dios Tata pa tur benefisio inmenso ku e a duna nos. Pa su bondat ku e kier a salba hopi hende pa medio di su yu Hesu Kristu. Sentro di e orashon solèm aki ta e rekordamentu di último Sena.

³ 2korintionan 9,7

Na momentu ku pastor ta invoká poder dibino riba e ofrendanan e ta pone su man i hasi un siñal di krus. Ku e akto aki e pan i biña ta troka na Kurpa i Sanger di Kristu. Tur hende ta hinka rudia. Komo un siñal di humildat. Despues pastor ta hasi e konmemorashon di último sena i konsagrashon.⁴ Ta sigui Aklamashon na Kristu, morto i resusitá. Aki tur hende ta lanta para den un siñal di viktoria. Hesus resusitá a vense morto. Ta sigui konmemorashon di misterionan di nos salbashon i ofresemantu di sakrifisio. E orashon aki ta kaba ku Doksologia⁵ resa dor di pastor. Fielnan ta konfirmá e orashon aki ku AMÈN.

Rito di komunión. Komunión ta ekspresá nos union den e kurpa di Kristu. Dor di komunión tur Kristian ta uni ku Dios den e mesun Kristu i dor di Kristu ku tur otro.⁶



Kuida mi karnénan.



Kompas Spiritual

Mei-Yüni 2010

Orashon di señor. Aki nos ta resa e orashon ku Kristu mes a siña nos esta nos TATA.⁷ Despues ta sigui un otro Doksologia.

Rito di Pas. E siñal di pas ta bai bek te e promé Kristiannan e ta un resultado di e rekonsiliashon ku a kuminsá ku e kristiannan i despues a brota den henter mundu.⁸

E kibramentu di Pan ta e di tres gran momentu di akshon di eukaristia. E promé Kristiannan tabata kompartí un pan komo símbolo di union.

Pastor ta hisa e hostia i e kális invitando tur e fielnan pa bini i kome for di e Kurpa di Kristu. Tur ta respondé ku e palabranan di e kapitan na Kristu. (Mateo 8:8). Señor mi no ta digno pa bo bini serka mi, ma papia un palabra so i lo mi ta kura.

Ora nos kaba di risibí nos ta bai bek nos lugá, kai sinta i resa òf kanta huntu komo siñal di union ku otro.

Rito di despedida. E rito aki ta konsentrá riba nos mishon. Dios ta manda nos den mundu ku e enkargo di hiba e pas i amor tur kaminda ku nos bai kompartiando e eksperensha ku nos a haña durante e selebrashon Eukarístiko aki.

Pastor ta duna e bendishon final. Nos ta baha nos kabes den un akto di humildat pa risibí e bendishon aki ku ta un siñal di Krus.

Den nos próksimo edishon nos lo konsentrá riba e diferente atributonan.



*I sa ku mi ta ku boso
tur dia, te na fin di
mundu.*



⁴ Mateo 26, 26

⁵ Doksologia = Dokso Gloria Logia =palabra òf papia. E ta un himno kòrtiku na Dios

⁶ Efesionan 3 1-13 i Efesionan 4 1-16

⁷ Lukas 11 1-4

⁸ Huan 14-27



When life gives you
a hundred reasons to cry
show life
a thousand reasons
to smile 

STÒP STAP

Area di desaroyo
SPIRITUAL



DESKRIPSHON DI E AKTIVIDAT

Un wega pa hasi durante un enkuentro normal pa siña e Bevernan konsentrá i para ketu un ratu. Un di e Bevernan tin wowo tapá i e mester purba skucha e otro Bevernan move.

META DI E AKTIVIDAT

1. Siña e balor di silensio.
2. Mehorá dominio propio.
3. Siña konsentrá.
4. Bira mas konsiente di bo propio presensia.

E TA KONTRIBUÍ NA LOGRO DI E SIGUIENTE OPHETIVONAN EDUKATIVO

Bever

1. Ta demostrá di ta respetá momentonan di silensio i refleksion.
2. Ta demostrá di ta dispuesto na akseptá ku otro hende tin sierto outoridat.
3. Ta kuminsá demonstrá di por tene su mes na regla.

MATERIAL

Un dashi pa tapa wowo di un Bever.

DESAROYO DI E AKTIVIDAT

Ta tapa wowo di un Bever. E otro Bevernan ta pará na un distansha for di esun ku wowo tapá (sea den sírkulo òf riba un liña). Riba señal di e lider e otro Bevernan mester purba aserka esun ku wowo tapá i mishi kuné. Esun wowo tapá mester purba skucha stap di esnan ku ta aserk'é. Ora e tende algu e ta bisa duru: “**Stòp Stap**” anto muestra den e direkshon di unda el a tende e stapnan. Tur Bever

mester para ketu un ratu. Si esun Bever a muestra riba un Bever, esun aki mester keda pará manera un estatua sin move mas. Riba señal di un lider, e otro Bevernan ta sigui aserká esun ku wowo tapá, te ora un di nan mishi kuné. Despues otro Bever ta haña turno pa tapa wowo.

Ta importante pa lider i tur Bever hasi e wega aki den silensio kompletu.

LUGA

Kaminda e Kolonia ta reuní. Por ta paden òf pafó.

DURASHON

15 minüt, dependiendo kuantu Bever haña oportunitat pa tapa wowo.

PARTISIPANTENAN

Bevernan di un Kolonia.